

## Փաստաբանին սպառնալու դեպքով քրեական գործ է հարուցվել

07.05.2013 16:15



Ոստիկանության Շիրակի մարզի քննչական բաժնում քրեական գործ է հարուցվել դատական նիստի ժամանակ ՀՀ փաստաբանների պալատի խորհրդի անդամ, փաստաբան Լուսինե Սահակյանի հասցեին հնչած սպառնալիքների փաստով: Ինչպես «Փաստինֆո»-ի թղթակցին հայտնեց Լ.Սահակյանը, քրեական գործը հարուցվել է ՀՀ քրեական օրենսգրքի 347-րդ հոդվածի հատկանիշներով՝ Նախնական քննություն վարելու կամ արդարադատություն իրականացնելու հետ կապված սպառնալիքը կամ բռնի գործողությունները:

Գյուլմրու Նախկին քաղաքապետ Վարդան Ղուկասյանի դստեր փեսացու Կարեն Եսայանի սպանության գործով ապրիլի 5-ի դատական նիստի ժամանակ փաստաբանի հասցեին հնչել էին սպառնալիքներ ու վիրավորական արտահայտություններ, ինչը դատարանի կողմից անարձագանք էր մնացել:

Հիշյալ սպանության մեջ մեղադրվող Հարություն Սարգսյանի պաշտպան Լ.Սահակյանը «Փաստինֆո»-ի թղթակցին հայտնել էր, որ դատարանում նախկին քաղաքապետի կողմնակիցների կողմից իր պաշտպանյալի հարազատների ու ընկերների հասցեին սպառնալիքներ անընդհատ են հնչում, սակայն իր հասցեին դրանք հնչել են առաջին անգամ: Փաստաբանի կարծիքով՝ սպառնացող անձինք նպատակ ունենին դատարան հրավիրված վկայի՝ մտավոր հիվանդությամբ տառապող երեխայի վրա ճնշում գործադրել ու դատարանում գողգողոցներով ու սպառնալիքներով վախեցնել նրան: Երեխան մեղադրող կողմի համար առանցքային վկա է, ըստ գործի նյութերի, նա տեսել է, թե ինչպես է Հ.Սարգսյանը նստում Կարեն Եսայանի մեքենան:

ՀՀ փաստաբանների պալատի նախագահ Ռուբեն Սահակյանը դիմում էր ներկայացրել ՀՀ գլխավոր դատախազին՝ խնդրելով փաստաբանի հասցեին սպառնալիքների փաստով քրեական գործ հարուցել: Գլխավոր դատախազությունը դիմումն ուղարկել էր ոստիկանության Շիրակի մարզի քննչական բաժնի՝ հանձնարարելով փաստի առթիվ նյութեր նախապատրաստել:

Աղբյուրը՝ <http://www.pastinfo.am/node/13684>

```
Վերադառնալ $(window).load(function(){ if(typeof $(".fb_comments_count").html() != "undefined" &&
parseInt($(".fb_comments_count").html()) != 0){ updateCommentsCount(window.location.href); } })
```